



Claude WISELER  
President vun der  
Chamber vun den Deputéierten  
19, um Krautmaart  
L-1728 Lëtzebuerg

Lëtzebuerg, den 18/05/2026

**Här President,**

**Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un d'Ministesch fir Sport weiderzeleeden.**

Den Institut national de l'activité physique et des sports (INAPS), deen den 1. Oktober 2023 op Basis vum Gesetz vum 1. August 2023 geschaaft gouf, huet als eng vu senger Kärmissiounen d'Ausschaffen, d'Organiséieren an d'Entwéckle vun de Formatiounen vun den techneschen an administrative Kadere fir déi verschidde Forme vun der kierperlecher a sportlecher Aktivitéit. Dës Formatiounen, déi am System vum Luxembourg Qualifications Framework (LUXQF) op de Niveauen 1 bis 6 strukturéiert sinn, ginn an enker Zesummenaarbecht mat den agreéierte Sportfederatiounen ugebueden, woubäi d'Modalitéite vun deene Formatiounen an de Konventiounen tëschent dem INAPS an de jeeweilige Federatiounen festgehale ginn.

Aus dem Sportsmilieu sinn awer Informatiounen bei mech erugedroe ginn, no deenen den INAPS de Moment keng nei Konventiounen mat Federatiounen fir d'Opmaache vun neie LUXQF-Formatiounsfiliëren ënnerschreift. Als Grond fir dëse Blocage gëtt eng feelend Rechtsgrondlag ugefouert, wouduerch nei Konventiounen eréischt nom Vote vun engem entspreichende rechtliche Kader – deen anscheinend nach ronn zwee Joer op sech waarde léisst – ofgeschloss kënnen ginn. Dës Situatioun ass besonnesch problematesch, well se Federatiounen, déi e konkrete Besoin u qualifizéierte Kadere mellen, d'Méiglechkeet hëlt, hir Formatiounen am offizielle LUXQF-Kader z'entwéckelen, an domat och de rezent vum INAPS presentéierten "Long Term Coach Development"-Konzept (LTCD) souwéi d'Qualitéit vum Encadrement am Lëtzebuerger Sport beanträchtegt.

An deem Zesammenhang wéilt ech der Ministesch dës Fro stellen:



1. Kann d'Madamm Ministesch bestätegen, datt den INAPS de Moment keng nei Konventiounen mat Sportfederatiounen iwwer LUXQF-Formatiounen méi ofschléisst, a wann jo, säit wéini ass dat de Fall?
2. Wéi eng Rechtsgrondlag feelt konkret, an a wéi engem Text (Gesetz, groussherzoglecht Reglement, asw.) muss dës nei geschaaft oder ugepasst ginn, fir d'Ënnerschreiwung vun neie Konventiounen erëm méiglech ze maachen?
3. Wéi wäit sinn d'Aarbechten un dëser neier Rechtsgrondlag fortgeschritt, a kann d'Madamm Ministesch bestätegen, datt mat enger Frist vu ronn zwee Joer ze rechnen ass, ier dës a Kraaft trëtt? Wisou ass dëse Manktum net schonn am Kader vum Gesetz vum 1. August 2023 iwwer den INAPS antizipéiert ginn?
4. Wéivill Sportfederatiounen hunn säit dem Inkrafttriede vum INAPS-Gesetz eng Demande fir eng nei oder iwwerschaafte Konventioun beim INAPS gestallt, a wéivill vun dëser Demande konnten aus de virgenannte Grënn net akzeptéiert ginn?
5. Wéivill nei Formatiounsfiliëren, respektiv LUXQF-Niveauen, kënnen aktuell aus dësem Grond net opgemaach ginn, an a wéi eng sportlechen Disziplinne mellst sech den dréngendste Besoin?
6. Wat fir Iwwergangsléisungen huet d'Madamm Ministesch respektiv den INAPS virgesinn, fir et de betroune Federatiounen ze erlaben, an dëser Iwwergangphas hir technesch an administrativ Kadere weiderzebilden an hire konkret Besoin u qualifizéierten Trainer ze decken?
7. Wéi ass dës Blockéierung mat der öffentlecher Kommunikatioun an der Zäilsetzung vum Konzept-Cadre "Long Term Coach Development" (LTCD), deem den INAPS de 21. Oktober 2025 presentéiert huet, ze vereinbaren, wëssend datt dës Kader explizit d'Integratioun vum LTCD an d'LUXQF-Formatiounen virgesäit?
8. Wat fir Konsequenzen huet dës Situatioun fir d'Persounen, déi am Kader vun deene betroune Federatiounen geplangt haten, eng LUXQF-Formatioun unzefänken? Gëtt et fir dës Persounen Alternativen, zum Beispill iwwer d'Homologatioun vu Formatiounen, déi am Ausland verfollegt ginn?
9. Plangt d'Regierung, déi vun dëser Situatioun betroune Federatiounen finanziell oder operationell ze ënnerstëtzen, zum Beispill iwwer ugepasste Subsidien oder spezifesche Begleetmoossnamen?
10. Wann eng nei Rechtsgrondlag tatsächlech eréischt an zwee Joer ëmgesat gëtt: wéi gedenkt d'Madamm Ministesch sécherzestellen, datt d'Qualitéit, d'Kontinuitéit an d'Diversitéit vum sportlechen Encadrement an deene betroune Disziplinen iwwer dës Period vun zwee Joer erhale bleift, an datt Lëtzebuerg net e Réckstand par rapport zum internationale



Sportsentwécklungsstandard krit?

Mat déiwem Respekt,

---

A handwritten signature in black ink, appearing to be "Clement".

CLEMENT Sven  
Deputéierten

